



O'ZBEKISTON RESPUBLIKASI VAZIRLAR MAHKAMASINING QARORI

20 22 yil « 28 » oktabr

№ 625

Toshkent sh.

Енгиб бўлмайдиган кучлар (форс-мажор) ҳолатларини тасдиқлаш бўйича давлат хизматларини кўрсатишнинг маъмурий регламентини тасдиқлаш ҳақида

Ўзбекистон Республикаси Президентининг “Давлат хизматлари кўрсатишни соддалаштириш, бюрократик тўсиқларни қисқартириш ҳамда давлат хизматлари кўрсатиш миллий тизимини ривожлантиришнинг қўшимча чора-тадбирлари тўғрисида” 2022 йил 20 апрелдаги ПФ–113-сон Фармони ижросини таъминлаш мақсадида Вазирлар Маҳкамаси қарор қилади:

1. Вазирлар Маҳкамасининг “Ўзбекистон Республикаси Инвестициялар ва ташқи савдо вазирлиги тўғрисидаги низомни тасдиқлаш ҳақида” 2019 йил 10 майдаги 390-сон қарорига мувофиқ:

Ўзбекистон Республикаси ҳудудида содир бўлган енгиб бўлмас кучлар (форс-мажор) ҳолатларини тасдиқлаш Ўзбекистон Республикаси Инвестициялар ва ташқи савдо вазирлигининг асосий функцияларидан бири этиб белгиланганлиги;

енгиб бўлмайдиган кучлар (форс-мажор) ҳолатларини тасдиқлаш Ўзбекистон Республикаси Инвестициялар ва ташқи савдо вазирлиги томонидан сертификат бериш орқали амалга оширилиши маълумот учун қабул қилинсин.

2. Қуйидагиларни назарда тутувчи **Енгиб бўлмайдиган кучлар (форс-мажор) ҳолатларини тасдиқлаш бўйича давлат хизматларини кўрсатишнинг маъмурий регламенти 1-иловага мувофиқ тасдиқлансин:**

талабгорнинг ташқи савдо битимлари, халқаро молия ёки инвестиция келишувлари ва халқаро шартномалари бўйича Ўзбекистон Республикаси ҳудудида бошланган ёки бўлиб ўтган енгиб бўлмайдиган кучлар ҳолатларини тасдиқлашга сертификат олиш учун Ягона интерактив давлат хизматлари портали (кейинги ўринларда – ЯИДХП) орқали Ўзбекистон Республикаси Инвестициялар ва ташқи савдо вазирлигига мурожаат қилиш тартиби;

енгиб бўлмайдиган кучлар ҳолатларини тасдиқлашга сертификат олиш учун ариза ва ҳужжатларни юбориш, уларни кўриб чиқиш ҳамда сертификат бериш тартиби ва муддатлари;

сертификат берилганлик учун йиғим ундириш;

сертификат беришни рад этиш тўғрисида қарор қабул қилиш асослари;

енгиб бўлмайдиган кучлар ҳолатларини тасдиқлаш учун берилган сертификатлар реестрини юритиш тартиби.

3. Ўзбекистон Республикаси Ҳукуматининг 2-иловага мувофиқ айрим қарорлари ўз кучини йўқотган деб ҳисоблансин.

4. Ўзбекистон Республикаси Ахборот технологиялари ва коммуникацияларини ривожлантириш вазирлиги Инвестициялар ва ташқи савдо вазирлиги ҳамда бошқа манфаатдор вазирликлар ва идоралар билан биргаликда **икки ой муддатда**:

мазкур қарор билан тасдиқланган маъмурий регламентга мувофиқ давлат хизматининг ЯИДХП орқали жорий этилишини таъминласин;

ЯИДХПда давлат хизматлари кўрсатилишининг ҳар бир босқичида муурожаатларнинг кўриб чиқилишини кузатиб бориш тартибини жорий этсин;

давлат хизматини кўрсатганлик учун йиғимларни Давлат хизматлари кўрсатилганлиги учун тўланган давлат божлари ва йиғимлар суммаси ҳисобини юритувчи ягона биллинг тизими орқали электрон тарзда тўлаш имкониятини яратсин.

5. Мазкур қарор расмий эълон қилинган кундан бошлаб икки ой ўтгач кучга киради.

6. Ўзбекистон Республикаси Инвестициялар ва ташқи савдо вазирлиги манфаатдор вазирликлар ва идоралар билан биргаликда ўзлари қабул қилган норматив-ҳуқуқий ҳужжатларни бир ой муддатда ушбу қарорга мувофиқлаштирсин.

7. Мазкур қарорнинг бажарилишини назорат қилиш Ўзбекистон Республикаси Бош вазирининг инвестициялар ва ташқи иқтисодий алоқалар масалалари бўйича ўринбосари – инвестициялар ва ташқи савдо вазири Ж.А. Ходжаев зиммасига юклансин.

Ўзбекистон Республикасининг
Бош вазири



А. Арипов

Вазирлар Маҳкамасининг
2022 йил 28 октябрдаги 625-сон қарорига
1-илова

Енгиб бўлмайдиган кучлар (форс-мажор) ҳолатларини тасдиқлаш бўйича давлат хизматларини кўрсатишнинг МАЪМУРИЙ РЕГЛАМЕНТИ

1-боб. Умумий қоидалар

1. Ушбу Регламент ташқи савдо битимлари, халқаро молия ёки инвестиция келишувлари ва халқаро шартномалар (кейинги ўринларда – шартнома) шартларига мувофиқ Ўзбекистон Республикаси ҳудудида бошланган ёки бўлиб ўтган энгиб бўлмайдиган кучлар ҳолатларини тасдиқлаш бўйича давлат хизмати (кейинги ўринларда – давлат хизмати) кўрсатиш тартибини белгилайди.

2. Давлат хизмати Ўзбекистон Республикаси Ягона интерактив давлат хизматлари портали (кейинги ўринларда – ЯИДХП) орқали Ўзбекистон Республикаси Инвестициялар ва ташқи савдо вазирлиги (кейинги ўринларда – ваколатли орган) томонидан кўрсатилади.

3. Давлат хизматини кўрсатиш ушбу Регламентга 1-иловада келтирилган схемага мувофиқ амалга оширилади.

4. Енгиб бўлмайдиган кучлар ҳолатларини тасдиқлаш ваколатли орган ваколатли шахсининг электрон рақамли имзоси (кейинги ўринларда – ЭРИ) билан тасдиқланган ҳамда ушбу Регламентга 2-иловага мувофиқ электрон шаклда QR-код (матрик штрихли код) билан расмийлаштириладиган сертификат бериш орқали амалга оширилади.

Енгиб бўлмайдиган кучлар ҳолатларини тасдиқловчи сертификат муддатсиз даврга берилади.

5. Ушбу Регламентда қуйидаги асосий тушунчалардан фойдаланилади:

енгиб бўлмайдиган кучлар – томонларнинг иродаси ва фаолиятларига боғлиқ бўлмаган табиат ҳодисалари (зилзила, кўчки, бўрон, қурғоқчилик ва бошқалар) ёки ижтимоий-иқтисодий ҳолатлар (уруш ҳолати, камал, давлат манфаатларини кўзлаб импорт ва экспортни тақиқлаш ва бошқалар) сабабли юзага келган шароитларда томонларга қабул қилинган мажбуриятларни бажариш имконини бермайдиган фавқулодда, олдини олиб бўлмайдиган ва кутилмаган ҳолатлар (форс-мажор);

талабгор – шартнома доирасида энгиб бўлмайдиган кучлар ҳолатларини тасдиқлаш мақсадида ҳужжатларни тақдим этувчи юридик ёки жисмоний шахс (шартнома томони).

2-боб. Давлат хизматини кўрсатиш таритиби

6. Талабгор давлат хизматидан электрон тарзда фойдаланиш учун ЯИДХПда рўйхатдан ўтади ва ушбу Регламентга 3-иловага мувофиқ шаклдаги сўровномани электрон равишда тўлдиради ҳамда қуйидаги хужжатларни юклайди:

шартнома(лар), қўшимча келишув(лар) (мавжуд бўлган тақдирда) ҳамда уларга спецификация(лар) нусхаси;

шартнома(лар) бўйича бажарилган мажбуриятларнинг ҳажмларини тасдиқловчи хужжатлар (банк томонидан кўчирилган маблағлар тўғрисида маълумотнома, ҳисобварақлар ва/ёки далолатномалар). Бунда хужжатлар шартнома(лар)нинг хусусиятидан келиб чиқиб тақдим этилади.

Талабгор ЯИДХПда сўровномани тўлдириб, ушбу хужжатларни юклагандан сўнг идентификация қилишнинг замонавий воситалари билан (электрон рақамли имзо, мобил-ID ва бошқалар) сўровномани юборишни тасдиқлайди.

Талабгордан ушбу бандда кўрсатилмаган хужжатларни талаб қилиш қатъиян тақиқланади.

7. Ваколатли орган томонидан сўровномани кўриб чиқиш учун йиғим ундирилмайди.

8. Ваколатли органга келиб тушган сўровнома ва хужжатлар рўйхат бўйича қабул қилинади ва хужжатларнинг тўлиқлиги кўриб чиқилади.

9. Ваколатли орган сўровномага мувофиқ Ўзбекистон Республикаси ҳудудида бошланган ёки бўлиб ўтган энгиб бўлмайдиган кучлар ҳолатларини талабгорнинг шартномасига таъсири, шартнома мажбуриятларининг ўзаро бажарилиши, мажбуриятларнинг муддатлари ва бошқа асословчи ёки тасдиқловчи хужжатларни ўрганади.

Бунда, ваколатли орган сўровномада кўрсатилган энгиб бўлмайдиган кучлар ҳолатлари мавжудлигини тасдиқлаш учун давлат бошқаруви органлари ёки хўжалик бирлашмалари ва бошқа ташкилотлардан хулосалар сўраши мумкин.

10. Давлат бошқаруви органлари ёки хўжалик бирлашмалари ва бошқа ташкилотлар ваколатли орган сўрови келиб тушган кундан бошлаб **ўн иш куни** мобайнида сўралаётган хулосани ёзма шаклда тақдим этиши шарт.

11. Ваколатли орган талабгорнинг сўровномасига мувофиқ содир бўлган энгиб бўлмайдиган кучлар ҳолатларини тасдиқлаш масаласини ўз маблағлари ҳисобидан жойига чиққан ҳолда ўрганиш ва баҳолаш ҳуқуқига эга.

12. Талабгорга сертификат бериш ёки беришни рад этиш тўғрисидаги қарор ваколатлари орган томонидан сўровнома қабул қилинган кундан бошлаб **ўн уч иш** кунида қабул қилинади.

13. Ваколатли орган талабгорни қабул қилинган қарор ҳақида ЯИДХПдаги шахсий кабинетни орқали хабардор қилади.

14. Сўровнома рад этилган ҳолатларда, рад этиш сабаблари ва қонунчилик ҳужжатларининг аниқ нормалари кўрсатилади.

15. Енгиб бўлмайдиган кучлар (форс-мажор) ҳолатларини тасдиқлаш тўғрисида сертификат бериш ҳақида қарор қабул қилинган тақдирда сертификат бериш учун базавий ҳисоблаш миқдорининг 90 фоизи миқдорида йиғим ундирилади.

Бунда, бир сўровнома билан бирга бир нечта (биттадан ортиқ) шартномалар бир вақтнинг ўзида тақдим қилинса, қўшимча ҳар бир шартнома учун базавий ҳисоблаш миқдорининг 50 фоизи миқдорида алоҳида йиғим ундирилади.

16. Талабгор сертификат берилиши тўғрисида хабар олгандан сўнг **бир иш кунида** 15-бандда белгиланган миқдордаги йиғимларни тўлайди.

Йиғим тўланганлиги Ягона биллинг тизими орқали тасдиқланади.

17. Ваколатли орган томонидан сертификат берилганлиги учун йиғим суммаси қуйидаги тартибда тақсимланади:

10 фоизи – Ўзбекистон Республикаси Адлия вазирлигининг давлат хизматларини ривожлантириш жамғармасига;

11,75 фоизи – Ахборот-коммуникация технологияларини ривожлантириш жамғармасининг Электрон ҳукумат ва рақамли иқтисодиётнинг идоралараро лойиҳаларини молиялаштириш бўйича махсус ҳисобварағига (шу жумладан, 0,5 фоизи йиғим тўланганлиги Ягона биллинг тизими орқали тасдиқлангани учун);

78,25 фоизи – ваколатли органнинг Ривожланиш ва моддий рағбатлантириш жамғармасининг махсус ҳисобварағига ўтказилади.

18. Йиғим тўланганлиги Ягона биллинг тизими орқали тасдиқлангандан сўнг ваколатли орган томонидан **бир иш кунида** QR-код (матрик штрихли код) қўйилган ва электрон рақамли имзо билан тасдиқланган сертификат Регламентга 2-иловадаги шаклга мувофиқ электрон шаклда талабгорнинг ЯИДХПдаги шахсий кабинетига юборилади.

19. Ваколатли орган томонидан сертификат беришни рад этиш учун қуйидагилар асос бўлади:

сўровномага илова қилинган ҳужжатлар бузиб кўрсатилган ҳолда тақдим этилганлиги;

шартнома бўйича мажбуриятларнинг Ўзбекистон Республикаси ҳудудида бошланмаган ёки содир бўлмаган енгиб бўлмайдиган кучлар оқибатида бажарилмаганлиги;

Ўзбекистон Республикаси ҳудудида шартномадан келиб чиқувчи мажбуриятнинг бажариб бўлинганлиги;

шартнома бўйича мажбуриятнинг бажарилмаганлиги энгиб бўлмайдиган кучлар давом этган муддатларга мувофиқ бўлмаслиги;

ушбу Регламентнинг 10-бандига мувофиқ давлат бошқаруви органлари ёки хўжалик бирлашмалари ва бошқа ташкилотларнинг энгиб бўлмайдиган кучлар ҳолатлари мавжуд эмаслиги бўйича асослангилган хулосаси олинганлиги;

Ўзбекистон Республикаси Фуқаролик кодексининг 333-моддасига мувофиқ талабгорнинг шартлашувчи шериклари томонидан мажбуриятларнинг бузилиши, мажбуриятни бажариш учун зарур товарларнинг бозорда йўқлиги, талабгорда зарур пул маблағларининг бўлмаганлиги;

талабгор томонидан тақдим этилган ҳужжатларда нотўғри ёки тўлиқ бўлмаган маълумотлар мавжудлиги.

Бошқа сабабларга кўра, шу жумладан мақсадга мувофиқ эмаслиги сабабли сертификат беришни рад этишга йўл қўйилмайди.

20. Талабгор рад этиш сабабларини бартараф этишга ва ҳужжатларни такроран кўриб чиқиш учун тақдим этишга ҳақли бўлган муддат камчиликларни бартараф этиш учун зарур бўлган вақтга мутаносиб тарзда белгиланиши, бироқ **беш иш кунидан** кам бўлмаслиги керак.

21. Талабгор сертификатни бериш рад этилиши учун асос бўлган сабабларни белгиланган муддатда бартараф этган тақдирда, ваколатли орган томонидан ҳужжатларни такроран кўриб чиқиш, сертификатни бериш ёки уни беришни рад этиш талабгорнинг рад этиш сабаблари бартараф этилганлиги тўғрисидаги сўровномаси ва рад этиш сабаблари бартараф этилганлигини тасдиқловчи тегишли ҳужжатлар тақдим этилган кундан эътиборан **беш иш кунидан** кўп бўлмаган муддатда амалга оширилади.

Сўровнома такроран кўриб чиқилганлиги учун йиғим ундирилмайди.

22. Сўровномани қайта кўриб чиқишда сертификат беришни илгари кўрсатилмаган янги асослар бўйича рад этишга йўл қўйилмайди, илгари кўрсатилган сабаблар бартараф этилганлигини тасдиқловчи ҳужжатлар билан боғлиқ рад этиш сабаблари келтирилиши бундан мустасно.

23. Сертификатни бериш рад этилганлиги ҳақидаги хабарномада кўрсатилган муддат ўтганидан кейин талабгор томонидан тақдим этилган сўровнома янги киритилган ҳисобланади ва ваколатли орган томонидан умумий асосларда кўриб чиқилади.

24. Талабгор сертификатни бериш рад этилганлиги тўғрисидаги қарор, шунингдек, ваколатли орган мансабдор шахсининг ҳаракати (ҳаракатсизлиги) бўйича белгиланган тартибда шикоят қилиш ҳуқуқига эга.

4-боб. Яқунловчи қондалар

25. Ваколатли орган томонидан берилган сертификатлар реестри ушбу Регламентга 4-иловага мувофиқ автоматик шаклда юритилади.

27. Зарур ҳолларда ваколатли орган томонидан хўжалик субъектларига, уларнинг мулкчилик шаклларида қатъи назар, хорижий мамлакатларда сертификат бериш, енгиб бўлмайдиган кучлар ҳолатларини тасдиқлаш ва сертификат олиш учун ҳужжатларни кўриб чиқишнинг бориши масалалари бўйича маслаҳатлар берилади.

28. Ушбу Регламент талабларини бузилишида айбдор бўлган шахслар қонунчилик ҳужжатларида белгиланган тартибда жавоб берадилар.

Енгиб бўлмайдиган кучлар (форс-мажор)
ҳолатларини тасдиқлаш бўйича давлат
хизматларини кўрсатишнинг маъмурий
регламентига
1-илова

**Енгиб бўлмайдиган кучлар (форс-мажор) ҳолатларини тасдиқлаш
бўйича давлат хизматини кўрсатиш
СХЕМАСИ**

Босқичлар	Субъектлар	Чора-тадбирлар	Бажариш муддатлари
1-босқич	Талабгор (Юридик ёки жисмоний шахс-шартнома томони)	Енгиб бўлмайдиган кучлар (форс-мажор) ҳолатларини тасдиқлаш бўйича сертификат олиш учун Ягона интерактив давлат хизматлари портали (кейинги ўринларда – ЯИДХП)дан рўйхатдан ўтади.	Хоҳишига кўра
2-босқич	Талабгор (Юридик ёки жисмоний шахс-шартнома томони)	ЯИДХП орқали сўровномани мустақил равишда электрон тарзда тўлдиради, ҳужжатларни юклайди ва ваколатли органга юборишни тасдиқлайди.	Хоҳишига кўра
3-босқич	Ваколатли орган (Инвестициялар ва ташқи савдо вазирлиги) Давлат бошқаруви органлари ёки хўжалик бирлашмалари ва бошқа ташкилотлар Ваколатли орган (Инвестициялар ва ташқи савдо вазирлиги)	1. Келиб тушган сўровнома ва ҳужжатларни рўйхат бўйича қабул қилади, ҳужжатларнинг тўлиқлигини кўриб чиқади. 2. Зарур ҳолларда, тегишли давлат бошқаруви органлари ёки хўжалик бирлашмалари ва бошқа ташкилотларга енгиб бўлмайдиган кучлар ҳолатлари (форс-мажор) мавжудлиги юзасидан хулоса олиш учун сўров юборади. Сўров келиб тушган тақдирда уни ўрганиб чиқади ҳамда ўн иш куни ичида ўз хулосаларини тайёрлаб ваколатли органга тақдим этади. 3. Талабгор тақдим этган ҳужжатларни, шунингдек, зарур ҳолларда, давлат бошқаруви органлари ёки хўжалик бирлашмалари ва бошқа ташкилотларнинг тақдим этган хулосаларини ўрганади. 4. Енгиб бўлмайдиган кучлар (форс-мажор) ҳолатлари мавжудлигини тасдиқлаш ёки рад этиш тўғрисида қарор қабул қилади. 5. Қабул қилинган қарор ҳақида талабгорни ЯИДХПдаги шахсий кабинети орқали хабардор қилади.	Ўн уч иш куни

4-босқич	Талабгор (Юридик ёки жисмоний шахс- шартнома томони)	Тўловни амалга ошириш тўғрисида хабарнома олган тақдирда ушбу Регламентда белгиланган миқдордаги йиғим учун тўловни (базавий ҳисоблаш миқдорининг 90 фоизи миқдоридан, бир сўровномада бирдан ортиқ шартномалар бўйича сўров қилинганда ҳар бир қўшимча шартнома учун базавий ҳисоблаш миқдорининг 50 фоизи миқдоридан) амалга оширади.	Бир иш куни
5-босқич	Ваколатли орган (Инвестициялар ва ташқи савдо вазирлиги)	<p>1. Тўлов амалга оширилганлиги тасдиқлангандан сўнг сертификатни тайёрлаб, талабгорнинг ЯИДХПдаги шахсий кабинетига юборади.</p> <p>2. Берилган сертификатлар тўғрисидаги маълумотлар Енгиб бўлмайдиган кучлар (форс-мажор) ҳолатларини тасдиқлаш бўйича берилган сертификатлар реестрига автоматик тарзда киритилади.</p>	Бир иш куни

Енгиб бўлмайдиган кучлар (форс-мажор)
ҳолатларини тасдиқлаш бўйича давлат
хизматларини кўрсатишнинг маъмурий
регламентига
2-илова

**Енгиб бўлмайдиган кучлар (форс-мажор) ҳолатларини тасдиқлаш бўйича
СЕРТИФИКАТ НАМУНАСИ**



**ЎЗБЕКИСТОН РЕСПУБЛИКАСИ
ИНВЕСТИЦИЯЛАР ВА ТАШҚИ САВДО ВАЗИРЛИГИ**

_____ **-сон СЕРТИФИКАТ* (НАМУНА)**

*Енгиб бўлмайдиган кучлар (форс-мажор) ҳолатларини тасдиқлаш бўйича давлат
хизматларини кўрсатишнинг маъмурий регламентига асосан*

1. Енгиб бўлмайдиган кучлар (форс-мажор) ҳолатларини тасдиқлаш тартиби

2. Енгиб бўлмайдиган кучлар (форс-мажор) ҳолатларини юзага келганлиги

3. Шартнома тўғрисида маълумот (шартнома тузилган сана, шартнома томонлари ва уларнинг жойлашуви, шартнома муддатлари, қарама-қарши мажбуриятларнинг бажарилиши ва бошқа реқвизитлар)

4. Шартнома мажбуриятларини бажаришда енгиб бўлмайдиган кучлар (форс-мажор) ҳолатларини юзага келганлигини тасдиқлаш

Сертификат берувчи органнинг ваколатли шахси:

_____ (лавозими)

_____ (QR-код)

_____ (Ф.И.О.)

***Изоҳ:** Сертификат давлат тилида ёки талабгор сўровига мувофиқ инглиз ҳамда рус тилида берилади.

Енгиб бўлмайдиган кучлар (форс-мажор)
ҳолатларини тасдиқлаш бўйича давлат
хизматларини кўрсатишнинг маъмурий
регламентига
3-илова

**Енгиб бўлмайдиган кучлар (форс-мажор) ҳолатларини тасдиқлаш
бўйича давлат хизматидан фойдаланиш юзасидан
СЎРОВНОМА**

Талабгор номи <i>(Юридик шахс – номи ва ташкилий- ҳуқуқий шакли, Жисмоний шахс – Ф.И.О., паспорт ёки ID – карта маълумотлари (серияси, рақами, санаси, ким томонидан берилганлиги)</i>	
Манзили <i>(Юридик шахс – жойлашган ери (почта манзили), Жисмоний шахс – доимий яшаш манзили)</i>	
СТИР / ЖШШИР (мавжуд бўлса)	
Электрон почта манзили (мавжуд бўлса) ва телефон рақами	
Хизмат кўрсатувчи тижорат банк номи	
Сертификат бериладиган шартнома(лар)нинг санаси ва рақами	
Сўровноманинг қисқача мазмуни, енгиб бўлмайдиган кучлар (форс-мажор) ҳолатларининг тавсифи <i>(улар содир этилган жой, вақт, давр ҳамда уларнинг таъсири)</i>	

Енгиб бўлмайдиган кучлар (форс-мажор) ҳолатларини
тасдиқлаш бўйича давлат хизматларини кўрсатишнинг
маъмурий регламентига
4-илова

**Енгиб бўлмайдиган кучлар (форс-мажор) ҳолатларини тасдиқлаш бўйича берилган сертификатлар
РЕЕСТРИ**

Т/р	СТИР/ ЖШШИР (мавжуд бўлса)	Талабгор тўғрисида маълумот			Сертификат берилган шартнома санаси ва рақами	Сертификат серияси, тартиб рақами ва берилган санаси
		Юридик шахснинг тўлик номи ва ташкилий-ҳуқуқий шакли / Жисмоний шахснинг Ф.И.О. ва паспорт ёки ID – карта серияси ва рақами	Манзили (Юридик шахс – жойлашган жойи (почта манзили), Жисмоний шахс – доимий яшаш манзили)	Электрон почта манзили (мавжуд бўлса), телефон рақами		
1.						
2.						
3.						



Вазирлар Маҳкамасининг
2022 йил 28 октябрдаги 625-сон қарорига
2-илова

Ўзбекистон Республикаси Ҳукуматининг ўз кучини йўқотган деб эътироф этилаётган айрим қарорлари РЎЙХАТИ

1. Вазирлар Маҳкамасининг “Енгиб бўлмайдиган кучлар (форс-мажор) ҳолатларини тасдиқлаш механизмини амалга киритиш тўғрисида” 2005 йил 15 февралдаги 63-сон қарори.

2. Вазирлар Маҳкамасининг “Ўзбекистон Республикаси Ҳукуматининг айрим қарорларига ўзгартиришлар киритиш ва баъзиларини ўз кучини йўқотган деб ҳисоблаш тўғрисида” 2005 йил 8 сентябрдаги 206-сон қарорига 1-илованинг 78-банди.

3. Вазирлар Маҳкамасининг “Ўзбекистон Республикаси Ҳукуматининг айрим қарорларига ўзгартиришлар киритиш тўғрисида (Ўзбекистон Республикаси Президентининг “Ташқи савдо соҳасида бошқарув тизимини такомиллаштириш чора-тадбирлари тўғрисида” 2017 йил 13 апрелдаги ПФ–5012-сон Фармони ва Ўзбекистон Республикаси Президентининг “Ўзбекистон Республикаси Ташқи савдо вазирлиги фаолиятини ташкил этиш чора-тадбирлари тўғрисида” 2017 йил 13 апрелдаги ПҚ–2887-сон қарори)” 2017 йил 14 июлдаги 499-сон қарорига илованинг 18-банди.

4. Вазирлар Маҳкамасининг “Ўзбекистон Республикаси Ҳукуматининг айрим қарорларига ўзгартиришлар киритиш тўғрисида (Ўзбекистон Республикаси Президентининг “Меҳнатга ҳақ тўлаш, пенсиялар ва бошқа тўловлар миқдорларини аниқлаш тартибини такомиллаштириш тўғрисида” 2019 йил 21 майдаги ПФ–5723-сон Фармони)” 2019 йил 28 декабрдаги 1046-сон қарорига илованинг 55-банди.

5. Вазирлар Маҳкамасининг “Инвестиция ва ташқи савдо соҳасида бошқарув тизими тубдан такомиллаштирилиши муносабати билан ўзбекистон республикаси ҳукуматининг айрим қарорларига ўзгартиришлар киритиш, шунингдек, баъзиларини ўз кучини йўқотган деб ҳисоблаш тўғрисида” 2021 йил 25 июндаги 393-сон қарорига 1-илованинг 5-банди.

6. Вазирлар Маҳкамасининг “Давлат хизматлари кўрсатишнинг инфратузилмаси такомиллаштирилганлиги ва аҳолининг давлат хизматларидан фойдаланиш имкониятлари кенгайтирилганлиги муносабати билан Ўзбекистон Республикаси Ҳукуматининг айрим қарорларига ўзгартириш ва қўшимчалар киритиш тўғрисида” 2021 йил 28 октябрдаги 661-сон қарорига илованинг 3-банди.

7. Вазирлар Маҳкамасининг “Аҳоли ва тадбиркорлик субъектларининг давлат хизматларидан фойдаланиш имкониятлари кенгайтирилиши муносабати билан Ўзбекистон Республикаси Ҳукуматининг айрим қарорларига ўзгартириш ва қўшимчалар киритиш, шунингдек, баъзиларини ўз кучини йўқотган деб ҳисоблаш тўғрисида” 2021 йил 27 декабрдаги 774-сон қарорига 1-илованинг 5-банди.